

KUMPUNAN
RAM LEH HNAM
HUMHALH

YMA AW



CHANMARI WEST BRANCH YMA CHANCHINBU KARTIN CHHUAK. VOL. XXIV. ISSUE NO.42 20th October 2013

68th YMA General Conference tluang takin neih zawh a ni ta

Chanmari West, 20th October, 2013 : October ni 15 atanga Khawbung-a neih tan 68th YMA General Conference chu October ni 17 khan tluang takin neih zawh a ni ta. He Conference-ah hian Kum 2013-2015 chhung atana Central YMA hruaitu tur thlan a ni a, Pu Lalbiakzuala, Khatla (Aizawl) chu President atan thlan a ni.

Conference-ah hian CWBYMA atangin palai 49 kalin, ni 14 zan dar 9:30 khan Aizawl an chhuahsan a, ni 15 chhunah tluang takin Khawbung an thleng.

Ni 15.10.2013 (Thawhle) zan Vantlang Inkhawmah CWBYMA Zaipawl chuan Palai Lawmna hla mawi takin an sa a, kan Branch YMA item pakhat Drama chu ni 16 chhunah entir a ni baw, kan Branch atanga item neitute'n tha takin an chanvo an tihlawhtling thei a, Branch YMA chuan lawmawm a ti hle.

Ni 16 khan CYMA President, T Sangkunga kaihhruiin rorel palai 1,373-in pandal-ah ro an rel a. "Sorkar dept tinin anmahni office building-ah parking an neih theih nan Central YMA-in hma la rawh se," an ti. Kum 2014 kumpuan atan 'Ram leh hnam humhalh' tih thlan niin, 2014-a YMA General Conference neihna hmun atan Ratu thlan a ni.

Ni 16 zan khan hruaitu hlun chawimawina, kumpuan bawhzui tha leh branch YMA chanchinbu tha lawmmante hlan a ni a; CWBYMA chuan Aizawl khawpui chhunga YMA Chanchinbu la tha lawmman 3-na kan dawng a, a ropui khawp mai. Mount Everest-a Mizo lawn chhuak hmasa ber - David Zohmangaiha leh Vanlalliana te leh Tlawng luia tuitla chhanchhuaktu, Vanlalbiaksanga Sailo, Kanan Veng, Aizawl te chawimawina hlan an ni baw.

Ni 17 khan CYMA President hlui, Lalchungnunga kaihhruiin Central YMA office bearer turte thlan a ni a, chungte chu: President - Lalbiakzuala, Vice President - Vanlalrema Rokhum, General Secy - Vanlalruata, Asst Secy - Lalhmachhuana, Treasurer - J Lalsailova leh Fin. Secy - Lalrochuanga Pachuau te an ni.

Central YMA Gen Secy, Vanlalruata'n report a pek danin, tun dinhmunah YMA hian branch 796, group 46 leh sub-headquarters 5 a nei mek a; member 3,89,557 mipa 2,32,435 leh hmeichhia 1,57,122 an ni.



(L-R Lalrochuanga Pachuau, J Lalsailova, Lalhmachhuana, Vanlalruata, Vanlalrema Rokhum, Lalbiakzuala)

Branch News

- Hun remchang hmasa berah Executive Meeting koh tum a ni.
- Chanmari West Branch atangin conference palai 49, bus 2 leh car 1 hmangin kan kal. Counter No.5-ah, hmun thumah thlen darh a ni a, kan Branch palaite tana zanriah buatsaih saktu Pu Rozuala Khawbung leh haw lama Champhaia zanriah buatsaihsaktu Pu Lalmalsawma (Sena) chungah Branch YMA-in lawmthu a sawi.
- Branch Vice President, Secretary, Asst.Secretary, Tresurer, Exe.Member Pu VL Thakima leh Pu Zonunsanga conference hmanga Khawbunga zin pawh an lohaw leh ta.
- Conference mamawh phuhruk nan Local Council in ₹1000/- leh Exe.Member Pu Lalchhanhima ten ₹ 500/- an rawn pe a, an chungah Branch YMA in lawmthu a sawi.
- Conference thlengtu Khawbung Branch hnenah tanpuina ₹ 2000/- hlan a ni.
- Central YMA-in thlatin chhuak YMA Chanchinbu a tihchhuah Aizawl khawpui chhung Branch zinga la tam ber lawmman 3-na Citation leh ₹2000/- dawn a ni chu Branch YMA-in lawmawm a ti hle.
- Conference a palai zawng zawng te, Zaipawl leh Lemchan entirtute chungah Branch YMA-in lawmthu a sawi.
- CWFC-in MPL season 2 khelh meka Ni 17.10.2013-a Kulikawn FC laka hnehna an chang chu an lawmpui hle, an khelh leh zelna turah duhsakna sang ber an hlan baw.



TUNKAR CHANGVAWN

Amaherawhchu he thil pakhat hi ka ti thin-hnung lama thil awmte chu theihngilha, hma lama thil awmte chu banin, Krista Isuaa Pathian chung lam koh chhan lawmman hmu turin tiamchin lam chu ka pan talh talh a ni.

Philipi 3 : 13,14

Editorial Board

Editor:	RLalringheta	9862358337
Joint Editor :	Lalchhandama	9862358347
	JLalnangliana	9862399658
News Editor :	Thangkhuma	9862303135
	Lalchhuanmawia	9862580558
	KLalremtuanga	9862119608
Cir.Manager :	Jacob Lalrinsanga	9612319779
Production Manager :		
	RL Thanhmuna	9436152760

Branch Office Bearer

President	C Lalarliana	9436142049
Vice President	K Darthantluanga	9436196071
Secretary	Zairemmawia	9862385654
Asst. Secretary	RL Thanhmuna	9436152760
Treasurer	R. Lalmachhuana	9436151817
Fin.Secretary	Lalrinliana	9862581814
Adviser-te :	Pu F Zosanga	9436142106
	Pu A Biaklawma	9436363169
	Pu Lalrengpuia Sailo	9862075614

Editorial :

CYMA general conference kan lo hmang zo leh ta der mai, palai kalte'n kham lo taka Khawbung an rawn hawsan mek lain kal ve lo te'n CWFC hnehna lawmin kut kan lo beng ve mek baw, kawng hrang hrangah kan vengin hlawhtlinna kan hmu ve mek zel, mi thilphalte inpekna zar kan zo chho mek e.

Khawvel changkang zelah Conference kal ve lote pawhin mahni inlum atangin conference kan lo chhim ve thei reng a (chiang vak loin). Intihhlimna lam hawi, mit leh beng titlai tak tak hmuh tur a tam hle mai.

Heng chanvo hrang hrang atanga hmuh theih chiang tak chu "Mihringte rilrua danglam bik nih duhna, mite mit leh beng hruai thei zawnga chanvo neih tumna" hi a ni awm e.

Zaipawl zawng zawng tih theih deuhthawin tluangtlan taka hla sa mai lovin, a behbawm engemawzat nen an zai a. Hei hian a tihlan chian em em chu, mite'n min chhinchhiah bik se, thiam danglam min ti se tih hi a ni awm e. Kan Mizo hla neihsa chi hrang hrang siam danglamin an rawn au chhuahpui a tih theih awm e.

Engpawh chu nise, khawvel leh Mizote hmasawnnain a ken telah ngai phawt ang. Kan Branch YMA pawhin chanvo tha takin an hlen a, a ropui khawp mai. A leh pek zelah hmasawna nen chanvo tha zawng neih theih zel tum ila a tha khawp ang.

CWFC te'n hnehna an chang leh ta, Editorial Board-in kan lawmpui rualin duhsakna kan hian baw e.

Article**Veng football kan buaipui thar leh****Ta**

AR Lammualah kan au a, veng mipui tam takin kan club inkhel kan tawiawm thin a, kan chak avangin kan hlim em em. Kan bengchheng a, miten min fak a, veng chhungah pawh thalaite titi ber chu Chanmari West Football Club chungchang a ni mek.

2000 chho vel khan Mizoram Football Association hnuai division sang ber kan ni thin a, hetih hun lai vel hian veng leh veng emaw YMA branch inelnaah pawh veng pum kan phur a, min chiah hneh hle. AR Lammuala inkhel entu ngah ber pawl kan ni thin.

Hriat loh karin kan boruak a hniam hret hret a, Mizoram football pawh a tlahniam ve telh telh baw. Mahse, nikum atangin electronic leh visual media nen tangkawpin professional zulzuiin Mizoram Premier League kalpui a ni a, ram pumah football boruak a invawrh kang leh fan.

Season hnihna atangin kan tel ve a, a chhe pawl tura ngaih kan nih lain, mi thahnemngaiten veng chhungah boruak chaw nungin rin aian kan che tha a, vawi hnih kan khel hawh tlawm nei lovin goal kan la chhuah lo va, vawi khat chakin a sang pathum zingah kan tel thei.

Vaivakawn lamah high school ka kal thin a, chutih hun laia school khata kan luhpui; a then kan pawl rualpuite chu Vaivakawn football chanchina chhuan duhawm ber ang hiala sawi ngam an ni.

High school kan luh atanga kum nga hnu velah an vul zui hle a, ram pum hriat hlawh phak niin khatih hun lai khan Vaivakawn chu football thiam veng tia sawi an ni. Mahse, an ni reng lo va, chhuan thar an neih loh avangin rei lo te hnuah an zuih ve mai.

Lammuala an inkhel kan en thin ka thiante khan tunah chuan kan veng inkhel an en a ngai ve ta tlat. Vaivakawn football chanchin kan sawipui thinte nen kan veng team chungchanghah titi kan vawrh a ngai ta.

Football-a hriat kan la hlawh hma daihin, Vaivakawna an hruaitu pakhat chuan "Chanmari West hian hma an sawn em em ang. Tualchhungah tournament mumal takin an nei a, Vaivakawn field-ah an rawn inkhel

a, an inzui haw nguah nguah zel. Football an lawm a, veng pumin an tuipui hle tih a hriat," tiin a sawi.

Pi Tlangkhumi Memorial, Tv Lalruatkima Memorial Tournament tihte khel h a ni thin a, mimalin sum an thawh tawh loh hnuah pawh YMA-in kum tin section inelna a buatsaih zui thin. Thalaiten kan hlutin nu leh pa tam takin min tawiawm a, naupang an bang bik lo va, a phur hlei hlei an ni.

Sporting Club pawhin kum bithliah inelna siamin, hriat loh hlanin kan veng atangin player tha, ram pum huap pawha zahpuiawm lo an chhuak a, veng mipuiten kan chhuang a, miten min hriat phah. Football nung taka kan kalpui lai khan naupang rilruah chi a intuh a, football thiam an rawn chhuak mai. Kum nga vel kal ta atang kha chuan veng leh veng inelnaah a tha pawla ngaih kan ni ta reng a.

Mahse, tunah chuan naupang talent tihpunna lamah YMA emaw Sporting Club emaw pawhin ke a pen ta meuh lo. Khawvel changkang zelah thil tih a harsa telh telh a, hemi kawnga thahnem ngai leh vei tan chuan kan hriat loh hlanin kan zuih thut ang tih a hlauhawm. Kum liam ta lam khan Pi Thanthuamliani Memorial Tournament buatsaih leh zawk a ni a, kan la hlut hle.

Club hruaitute erawh chuan kan hniam ber lai pawhin tha an thlah lo va, ro ngawih ngawih leh tute mahin an hriatpui mang loh lain an lo bei fat fat a, tunah a arh chhuak a, hmabak eng tak neiin veng pum a chaw nung thar leh.

Football ang tho hian thil dang pawhin veng chhung dap chhuakin boruak a nei thin. Kawng dan en ila, YMA-in faina a buaipui lai hma leh hnuah kan dinhmun te, zirna uar kum puan a nih lai vela zirlaite kha inzir puitling tak tak an ni hlawm.

Tih tak zeta thil buaipuiin awmzia a nei tih lantirtute pawh a ni thei. Khawtlangin tha taka a thlawp miau avangin YMA hmalakna hian lukhawng a nei thin a, a hun lain a rah seng nghal lo mah ila a hnuah nghawng a nei fo. Khawtlang nunin hma a sawn a, a changkan theih nan khawtlang huapa kan thil buaipuiin awmzia a nei a ful.

Chawngbawla Section

- ☐ An Fin. Secretary Pu Rosangpuia te'n fanu duhawm tak an nei thar a, an lawmpui hle.
- ☐ An Comt. member Tv Joseph Lalmalsawma chuan ni 23.10.13 2:00 pm khian Chanmari West Presbyterian Kohran Hall-ah nupui a nei dawn a, Committee member puite lawmpui tura a ngen angin telpui theuh turin an inhriattir.
- ☐ Ni 18.10.13 zan khan Chawngbawla Run Bungrua In chhuar siam hnatlang neih a ni.
- ☐ Hnatlang zawng zawngte Pi Nutei leh Pi Sangtei te'n thingpui an lum sak a, an lawm hle.
- ☐ Ni 22.11.13 a vengchhung huap Beat CONTEST neih tura hmalak zel a ni a. Entry Form Pu Mapuia (Khuangpuiliana) Dawr kawipui leh BZ Sailo Blue Wave hnenah lak theih a ni e.
- ☐ An Member Lalchhandami d/o Lalchhuanawma (LCHA) chu Newlife Hospital-ah a awm mek a, dam taka a rawn chhuah leh thuai an duhsak hle.

Khuangchera Section

- ☐ An Treasurer Pu Lalliansanga (Malala) nupui Pi Lallianpuui (Maliani) Damdawi in a awm mek chu dam taka a lo chhuah leh ngei an duhsak.
- ☐ Conference Khawbunga neih zawh taka section a'anga hruaitu leh member kal zawng zawngte chungah an lawm hle.
- ☐ Silver Jubilee Fund leh Chhiatni Fund khawn tur chu hruaituten an kawm hunah lo ngaipawimawh hram hram turin an inngen.
- ☐ Tunlaiin vengchhungah Exam nei lai mek an awm avangin midangte tana bengchheng siam lo turin an inngen.
- ☐ Section chhungah Ui leh Ar chhuak a tam leh fan tak avangin hruaitute ui leh ar vaia hnatlang nei tura lo inring turin an inngen.
- ☐ Section chhung hmun ualau taka ruithheih thil ti thinte ti tawh lo tura hriattir an ni a, man an nih chuan na taka zilhhau an ni ang.

Neuva Section

- ☐ Tunkar hun remchang hian Committee koh an tum.
- ☐ Pu V. Thangbuka, Durtlang Hospital-a awm pawh dam takin a lo chhuak leh ta.
- ☐ An hruaitu Pu Michael Lalhriatpuia zin pawh dam takin a lo haw leh ta a.

- ☐ Section member YMA 68th General Conference a kalte inpekna ah hruaituten lawmthu an sawi a.
- ☐ Sumtuak atana duan/siam "Kawngpui Ningkhawng' bu pawh tunkarah peih fel beisei a ni a. Member-te hnatlanga chhuak theuh thei turin an inngen nghal bawk.
- ☐ Tunlaiin Section chhungah Ui a tam leh ta hle mai a, Ui vulhtute mahni ran vulh theuhthe khuahkhirh tha turin an inchah a. Ui leh Ar man a nih chuan EVL Hruaitluanga, Secretary, N-Sec. hnenah hriattir thin tur a ni.
- ☐ Chhiatni Fund khawn leh mek a ni a, bial tinah khawntuten an khawn ang ang Fin. Secy. N1. Lalramengi hnenah thehluh tur a ni.
- ☐ Section tana Mitthi Signboard tha tak mai petu Pu C Sangkhuma (T-sect) chungah lawmthu an sawi.

Taitesena Section

- ☐ Pi Lalmuanpuui'in an fapa Zothansanga hriatreng nan ketli a pe a. Pu Hmingthanzama-te chhungin an nau boral ta hriatreng nan bungrua leina tur ₹ 5000 an pe a, thilpek petute chungah lawmthu an sawi.
- ☐ Hun remchang masaber ah Committee meeting thut an tum.

Vanapa Section

- ☐ Waiting Shed tha tak mai chu Upa Lalrawna kawtah Asst. Leader Pu H. Vanlalvena hoin siam a ni ta.
- ☐ Conference-ah Leader hoin mi 15 te chu Khawbungah an kal a, dam takin an lo haw leh ta.
- ☐ An member LR Bawlliana'n fapa duhawm tak a nei a, an lawmpui hle.
- ☐ Vengchhunga vantlang thilte dimdawi turin nu leh pate mahni fate theuh zirtir turin an inngen.

LUNGHLU ROAD

Ni 18&19.10.2013 zingkar khan hnatlang an nei a, Pu Thangvunga In thleng kawng zawh fel a ni.

CWFC SUPPORTER

Ni 21.10.2013 (Thawh\an) zan inkhawm banah kan veng mi a duh apiang tan Indoor Stadium TT Hall-ah in tih phur tawn nan leh kal dan phung\ha zawk kan neih theih nan Supporter-te chuan kal\heuh turin min sawm a, kal\heuh i tum ang u. Au hla zir nghal tur a ni. I vengtan han pen chhuak ve rawh le.....

✠ Kan Then Tak ✠**LALREMRUATI (MAMI)**

Lalremruati hi Pu K Lalnuntluanga leh Pi Lalthanzami te fa 5 zinga a naupang ber dawttu niin Nov. ni 3, 1980-ah a lo piang a, mi hlim thei tak leh rual pawl thiam tak a ni. Mi hriatthiamna ngah leh mi khawngaih thei tak a ni. Chhungkaw huikhawmtu tha tak a ni. Kum 2007-ah Ricky Lalmuanpuia nen innein, fapa 3 leh fanu 3 an nei. Pathianah lawmna nasa tak neiin, fawngtai a ngaina hle. Kum 2008-ah Chuap TB a vei tih hmuhchhuah a ni a, damdawi tha taka eiin, a chhungte pawn a that chhuah leh mai an beisei laiin a natna chuan zual lam a pan zel a, October thla khan Durtlang Hospital-ah admit leh a ni a, Ni 15, Oct, 2013 (Thawhle) zan dar 10:15 khan chatuan ram a lo pan ta a ni.

**CWSC**

- ☐ Salvation Army, Chanmari West Corp ten supporter te hman atan khuang tha tak mai pahnih CWSC te an pe a, an chungah an lawm hle.
- ☐ Veng mipuite fawiamnaah lawmthu an sawi. inkhelh leh hun tur chu-Ni 22.10.13 (Thawhle) zan dar 7:30 ah Mizoram Police FC, Ni 25.10.13 (Zirtawp) zan dar 7:30 ah Aizawl FC nen. Entute mawi taka khawsa tur te, midangte tana hnawksak a awm lo tur leh Veng timualpho zawnga khawsa lo turin an ngen takzet a ni.
- ☐ Pu Zothansanga Tochwawng 'N' in Players te Track Jacket lei na tur a rawn pe a an lawm takzet a ni.
- ☐ PPP Mode bawlhhlawh paih man khawn mek chu chhungtinte tha taka lo pe turin an ngen

ZOFA

- ☐ Zirlai exam mek a nih avangin thla thar lamah Cheraw zir tura ruahman a ni
- ☐ Club member engemawzat chu hruaitu Pu Patea (President), Pu Thaa (V.President) leh Comt. member thenkhatte nen YMA Conference-ah an kal, dam takin an lo haw leh ta.

PHYSIOTHERAPY DISCOUNT

Saitika, Kawng na, Nghawng na, Tha na, Tha tawm, Dar na, Khup na, Tihrawl na, Pangkhing zeng, Sports injury, Hmai sawi, Nerve tha lo leh a kaihnawih natnate chu khawl hmangin October thla chhung hian 25% discount-in kan enkawl thei e.

In entir hun :

Thawhtan atanga inrini

Zing : 6:30am - 9:00am

Tlai : 1:30pm - 5:30pm

Aizawl Physiotherapy Clinic
Chanmari kawn,

Chanmari Presbyterian Biak In bul
Ph. : 2347456 / 985690775 (2-1)

KIDS DEN PRE SCHOOL & DAY CARE, CHALTLANG**ADMISSION NOTICE**

Kids Den Pre-School,
Chaltrangah November ni 1,
2013 atangin Session thar
tur Admission Form
semchhuah tan a ni ang.
Fee Structure leh hriattur
dang pawimawh chu
School Notice Board-ah
tarlan a ni e.

Sd/-
Principal

BLESSED PHYSIOTHERAPY CLINIC

Tha na, Nerve tha lo,
Ruhchuktuah na, Kawng na,
Sciatica, Pangkhing zeng, Hmai
sawi, Nghawng na avanga lu na
....etc kan enkawl thei e

October thla chhungin 50%
discount a ni ang.

Monday-Saturday: 9:00 am - 5:00
pm chhungin National Institute
atanga zir chhuak te'n uluk takin
an lo enkawl ang che

Contact No - 08974732041

Chanmari, Ramhlun Road

Aizawl, Mizoram

CWSC VALLEYBALL

☐ Ni 6.11.2013 atanga neih tur Inter Village Tournament-a tel turte chu ni 21.10.2013 tlai 4:30pm hian Indoor Stadium-ah Practice tura kal tur a ni.

☐ Inter Village Volleyball Tournament awm turah Local Council chuan Entry Fee ₹ 500/- an tum sak a, an lawm hle.

☐ Inter Village Volleyball Tournament neih turah Pu Lalremmawia, T-Sec. chuan tournament-a hman atan ₹ 500 a pe a, a chungah an lawm hle.

☐ Ni 22.10.2013 (Thawhle) zan hian NL Lalhmingmawii, CH-Sec. Inah Committee an ko a, member-te kal theuh turin an inhriattir.

Chanmari West mi tawh phawt chu tel theih a ni.



Special Performances by
Ably, Apples, Rock Flabs, Blue Wave Band

BEAT CONTEST

A Hun : Dt.22/11/2013 Dar 7:00Pm

A Hmun : YMA PARK

1st Prize - ₹. 10,000/-

2nd Prize - ₹. 5000/-

3rd Prize - ₹. 3000/-

Individual Prizes ₹.500/- each

**JUDGES**

1. Ephraim Malsawma (Bad Combnation)
2. John Tetea (Drop Doubt)
3. Joe Ralte (Axis)

Sound : Delta

Entry Form Lakna: Elar Enterprise (Mapaia) Kawipui CH Sect.

ORGANISED BY CHAWNGBAWLA SECTION CWBYMA

MALARIA CHUNGCHANGA THIL PAWIMAWH TE

- ❖ MALARIA hi natna hlauhawm tak, thihpui thut theih, Anopheles thosi seh atanga mihringin kan kai thin a ni.
- ❖ MALARIA lanchhuah dan langsar zual te chu - lu na, khawsik, tlun, chau ngawih ngawih, chaw ei tuilo, tihrawl na kham them thum, pum nuamlo leh luakchhuak te a ni.
- ❖ MALARIA laka invenna tha ber chu zana thosilen damdawia chiah zar hnuai mut te, in leh a vela thosi pian theihna chi tui tling awm reng reng pah bo te leh DDT a inchhung kah tir hi a ni.
- ❖ Tui in atangin Malaria a vei theih loh.
- ❖ Malaria ni a i inrinhlelh chuan mahni venga Sub Centre emaw ASHA emaw CHV hnenah i thisen exam tir thuai ang che.
- ❖ Sub Centre, ASHA leh CHV te hnen a thisen exam tir leh damdawi lak te hi a thlawn vek a ni.



DISTRICT VECTOR BORNE DISEASE CONTROL PROGRAMME
OFFICE OF THE CHIEF MEDICAL OFFICER
AIZAWL EAST DISTRICT